

靜

厓

詩

初

稿

靜厓詩初稿卷四

鎮洋 汪學金 敬箴

古今體八十一首

起庚寅五月盡辛卯九月自江右入都往返作

入都二首

攬衣上高堂再拜已含涕當茲遠遊辰益念鮮兄弟父
母知我悲勉強相慰止父言審交遊毋言慎身體
旦發章江頭暮宿彭蠡口不見南昌城馬上時回首老
鳥鳴深桑乳犢依高柳物類感我懷方寸紛如糾

留別蘇琛溪

嗟我長征感行役
憐君獨客歎支離
狂如中散山濤愛
貧似夷吾鮑叔知
燕市寒聲催木葉
楚天明月怨江離
郡齋回首成千里
落日河梁匹馬遲

別陳慎珍兼送歸閩

歲暮言將返遲留又一春
今朝章水上翻作送行人去
去風塵際勞勞江漢濱
知君收客淚計日便歸閩
與君皆遠道羨子是還家山驛多啼鳥
溪橋有雜花衣
留彭蠡雨馬度武夷霞
獨我京華去無端客思賒

祖席示幕中諸君二首

五月江城柳色新
茫茫碧草滿江濱
可憐楚尾吳頭客
又是燕南趙北人

金臺千里暮雲高
白馬青蛇意氣豪
欲唱詞人新樂府
十年已薄鬱輪袍

遊東林寺

飽看匡廬色
東林聞午鐘
虎溪尋遯跡
蓮社叩禪宗
簷樹飛晴瀑
窓雲抱雨峯
勞勞塵鞅客
對此自疎慵

小池口早發

夜半蒼茫起
征人意自傷
荒雞催客早
疲馬厭途長
山

月四更黑江風五月涼一鞭緣底急曉夢隔潯陽

皖江道中

潯江西去皖江東席帽征衫笑轉蓬山鷗數聲松葉雨
溪蟬十里藕苗風旗亭貰酒缸花綠村店題詩蠟穗紅
明日燕臺南望處吳頭楚尾怨青楓

廬州行館為亡妹設奠詩以志痛

淡煙疎雨蜀山青不子無端馬足停
根觸征衫兩行淚斷蟬淒咽不堪聽

天涯地角兩茫茫客館重來奠桂漿
此日魂兮招不得

廬江婁水又潯陽

潯陽回首渺愁余
問訊還憑雙鯉魚
記得當年鮑明遠
客中曾寄大雷書

早晴

層雲捲北巘
積雨收南垆
灌林幕餘潤
萋隴被幽馨
初霞不成綠
曉煙相與青
南風拂人來
蕩如析宿酲
頓令塵翳內
耳目得虛冷

旅次聽雨

天涯馬首怨難勝
旅次荒涼寐轉興
千里黃河傳遠曲

一年青髻對疎燈
寒幃殘夢人如月
擁枕孤吟客似僧
况是南風吹夜雨
茅檐淅滴亂愁增

月

花下愛看眉似月
牀頭愁見月如眉
隔江三五清光裏
小立黃昏掠髻絲

曉渡

殘月墮溪水雞聲喧一村
濛濛浦樹白曖曖溪煙昏
行喚前渡村家尚閉門
我行貪利涉苦辛寧復論
旃慎明發感喟毋中存

積霖歎

積雨決田壞官路水深泥滑馬不渡濕衣及膚燎不得
主人號咷僮僕訴行人爭羨居者安誰知居者尤艱難
一年耔本逐流水赤腳老農瞠目看來朝乾鵲噪簷樹
行人歡喜搖鞭去暮宿前村府帖來淮南又報蝻如雨
書所見

征人亦識田家苦水旱無端總可哀亭長喧傳奉牛酒
使君親為捕蝻來

夜起

靜庵詩初稿

卷四

四

羈人起夜半殘月在四野天風吹孤雲明星欲西下遠道苦阻艱太息視羸馬獨立黯自傷誰念遠遊者

河間道中早行

偏衫席帽慣長征清露涼颼趁曉行鄉夢遠隨殘月影客愁併起亂雞聲遊梁詞賦慚司馬入洛年華感士衡最是旅程秋信早哀蛩又傍馬頭生

紀行十首

滕王閣外兩番春芳草茫茫別思新如此西山好山色可憐不送渡江人

村外鷓鴣相應鳴
稻花臨水水雲生
兒童愛就松陰坐
笑指征鞍觸熱行

十里泉聲五里松
隔溪何處白雲鐘
羨他關吏無迎送
閒看匡廬雨後峯

東林聞說古雲寮
名士高僧記六朝
欲問風流舊蓮社
亂蟬聲裏虎溪橋

煙雨濛濛村火微
松林茅店露依稀
輕雷忽過青山外
齊檢松枝燎濕衣

林外山鳩又喚晴
青山點點馬頭生
鷺鷥低掠斜陽去

靜厓詩初稿卷四

五

是處溪田放水聲

客渡潯陽首重回
征程昨日過黃梅
馬蹄又到江南路
誰信依然作客來

松風拂地石泉冷
山色依然郭外青
莫問龍眠舊名士
酒旗歌扇也凋零

葛衣輕健晚風過
垂柳垂楊近水多
屋裏青山城外屋
夕陽村巷一羣鷺

日日長亭更短亭
午雞啼罷客驂停
山村已報黃梁熟
底事盧生夢未醒

七夕旅懷

天末起孤愁，明河入夜流。
今年初作客，此夕最悲秋。
南國無鴻雁，他鄉見女牛。
更誰吹玉笛，雙淚落盧溝。

雨夜宿李劍門寓齋

涼風吹夜雨，蕭瑟滿書閨。
一夕持君酒，三年念客衣。
細蛩孤燭暗，落葉遠鐘微。
盡是辭家者，天涯計總非。

秋蝶四首

蝦鬚簾底碧，雲叢冉冉煙。
綃淺淡中隄，上芳魂幽草綠。
江南舊夢落花紅，零星金粉微粘露。
蕩漾羅紃乍剪風。

正是傷秋人懶起多情低綴玉丁東

秋雨初晴綠滿塘春駒著意為秋忙短籬門掩圍寒菜
廢圃人來送夕陽可是前身依夜合漫提小字說丁香
海棠一簇紅無主似水年光最斷腸

愁黃怨碧漸依稀一縷芳心伴夕菲露壓琴窓憐繡袂
月明簫館想銖衣祝英臺近人何處秋水篇中夢又歸
曾記西園送行跡綠苔點點看雙飛

淒咽寒蟬泣綠蕪等閒重見玉腰奴奩收霜繭青蟲老
釵冷雲鬟翠鳳孤香蠹未消隨橘化倦翎初病倩花扶

三春細搦滕王本却對西風憶畫圖

送陳伯恭下第歸商邱

昨夜西風雁影過急裝輕策渡黃河
殘尊燕市寒聲濶瘦馬夷門落日多
千里煙花思遠道

君祖居宜興

年琴劍

付悲歌陽關一曲當壚唱也為書生斂翠蛾

咏紅葉

九秋風物儘雕斲憶到霜風舊石巖
山閣豔留詩史筆村橋酣殢酒人衫
尋僧吾谷迷孤寺送客吳江隱片帆
誰為荆關添畫本亂峯紫翠夕陽銜

田家

滿屋杏花白田家晝掩門春人多在野啼鳥不過村風
雨新年好鄉鄰舊俗敦倘從雞黍宿便是武陵源

旅次風雨遇王樸齋學博夜話

山村夜宿風怒號夜半啟蟄春雷高紙窓破屋燈火滅
夜雨欲透三重茅披衣不寐坐向壁有客呻吟夜歎息
啟戶就君接膝談對牀風雨消今夕君言家世本清貧
負郭之田尚可耘少時弄筆壓儕輩意氣遂欲干青雲
四十年來未得志祿仕蹉跎就廣文賦命窮薄不可說

其閒變故尤紛紛中年庾信傷心賦予立熒然最愴神

撲齋喪偶并殤二子

生者徒爾爾死者長已矣有母在高堂何以

奉甘旨功名未敢厭長途京華馬首三千里得第何足
多聊以慰老母兒行母心悲兒官母心喜無那頻年伏
櫪鳴不逢伯樂非知己今年又作渡江人風餐水宿何
時止何不當初抱黃犢開門放眼春山綠田家雞黍樂
高年有妻有子願已足余聞此語劇悲辛嗟爾風塵憔悴
身憔悴風塵勿復道卽論離別傷懷抱君不見西鄰
村農呼婦語牀有嬌兒膝有女布衣飽飯睡夢騰年年

靜厓詩初稿

卷四

八

衣食三春雨

新柳

如睂如眼復如腰
綠到江南第幾橋
莫道當風纔一縷
東君為爾已魂消

緒風絲雨儘丰神
長短亭邊送遠人
知我今年離別早
河橋先放一分春

宿州道中早發

羸馬頻年怨道賒
僕夫催我駕征車
孤村夜雨入寒柝
一路曉風開野花
荒驛未逢江上使
亂山難到夢中家

黃河北去春裘冷二月叢蘆捲白沙

大雪曉行

嘶馬縮寒毛朔風曉怒號亂雲埋野樹急雪灑春袍北
地花期遠前村酒價高短衣雙眼箭誰學羽林豪

見杏花作

何處村莊露細翹深紅淺白也魂銷迎風三日春當路
帶雨一枝夜過橋薄暝尚分沽酒旆嫩寒已喚賣錫簫
阿儂拋擲江南夢逐隊看花馬足遙

晚至汶上縣

晚路貪新霽行行送夕曛
亂鴉先客宿歸雁入春聞
浦樹明殘雪村炊隔暮雲
羈心逐汶水難到楚江濱

晚過趙北口

重來趙北驚心處水後村家尚未齊
大澤風霾行騎恐枯楊夜火怪禽啼
居人曉市爭蛟蜃隔歲秋潮亂犬雞
多謝長官勞遠慮肯將力役事春隄

和壁閒韻

隄邊春水又齊篙隄上垂楊未覆橋
舊俗屠沽餘慷慨夕陽村落易蕭條
黃圖事業雞聲壯青髻年華馬足消

此地瀛洲如可接

有坊額曰地接瀛洲

蓬山誰信隔層霄

入都東舊遊諸子

郎官清貴愛吟詩
賓從常嫌下直遲
記得門前秋水滿

夕陽陂外立移時

天津王秋坪

依然夢佐舊才名
莫識雲閒陸士衡
憔悴青衫歸未得

年年春草五茸城

青浦陸樸堂

酒壘寄崙君愛我
詞場睥睨我知君
但須十斛廷珪墨

題遍人閒白練裙

武陵貴香巖

傾蓋論交意最敦
知君奇氣滿夷門
迦陵詞酒縱橫後

又見東吳少保孫

商邱陳伯恭

憶家園

二月江南劇可憐
家園最好浴蠶天
溪人釣艇桃花裏
村女茶筐穀雨前
水市送魚穿柳線
山厨炊餅裹榆錢
如何客舍雙青鬢
聽到鶯聲便惘然

紀夢

夢逐東風夢轉迷
海棠庭院夕陽西
小姑溪上桃花水
少婦樓中燕子泥
多懊惱時紅袖濕
不惺忪處翠鬟低
春愁歷亂知何似
二月絲楊剪未齊

病中有感

卧病休文百感俱萍蓬蹤跡更何如漁樵自足滄江業
風雪偏隨計吏車夢裏雞鳴思寢膳天邊雁翼想音書
九衢冠蓋人如海莫道長安是易居

藥鼎茶鐺晝閉門索居容易近黃昏支離歲月遲歸計
保護風霜念母言撫劍一彈長缺在廢書三歎短檠存
難忘櫻笋鄉園好機笠芒鞋處處村

送春

落絮縈低戶飛花委軟塵鶯啼愁裏夢客送病中春怯

言才
冷衾裯戀忘憂卷帙親治遊車似水差喜巷無人

謝存塘舅氏贈劍

腰下吳鉤百萬緡燕臺持贈寶光新十年常伴封侯骨
四座初驚出匣身客館夜深騰虎氣歸裝秋老澀魚鱗
延津一去無消息重向豐城省舊因

出都留別舊游諸子

一夕飛花攪客思故人尊酒底須辭病如落絮全無力
愁似眠蠶不斷絲蕉蔭生涯初醒夢雪鴻蹤跡未移時
何堪長笛南樓夜月上潯江獨咏詩

昭烈村

漢祚將移日英雄崛起難中興符創業正統屬偏安將
帥風雲合君臣魚水歡樓桑問遺蹟草樹暮村寒

燕昭王墓

督亢城邊路逶遲昭王愛士有遺祠高臺名勝千秋在
古墓樵蘇獨客悲駿骨秋風嘶石馬魚膏夜火照斑駁
燕丹養客真貽媿秦豎荆卿盡市兒

東阿舊城

雉堞參差望裏分郊原禾黍綠紛紛斷厓泉放千盤雨

夾嶂人穿九折雲，廢閣蒼苔曹植廟殘碑。
青草項王墳，英雄消歇才華盡。匹馬荒城送夕曛。

舒城道中遇雨

客程爭晚渡，溪上白雲昏。
馬覓煙中樹，人歸雨外村。
壁苔多上屋，溝水直過門。
今夜山莊宿，泉聲夢裏喧。

北峽旅館見梁豐山師和錢香樹尚書山行之作
依韻賦此

倦眼眯風塵，曉行得奇覲。
恍惚名山圖，置我軒楹右。
密林迴溪深，重巖卷雲皺。
初春理策過，轉眼停車復村莊。

結構精松石紛羅鬪尺幅翔天鸞
椽筆開靈鷲肪割鮫
謝腴骨森歐褚瘦心香夙所宗
意匠尋其腠公昔懸冰
壺選造覺斯後弭節眺川原
揚旂拂亭堠偶愛此景佳
曾約山靈又清娛憩菴林
鴻製凌文囿願持翰墨真勒
作珉璣壽何處仰高山
衡峯鬱蒼秀

時開府
南楚

桐城道中

白雲匝地曉風冷細草芊綿雜樹蒼
修竹連溪衫影碧
層峯飛雨髻絲青山家就澗烹茶
薜樵客尋松廟茯苓
此處停車堪小憩頻年塵土夢應醒

左忠毅公墓

羣小要孱主孤忠忤大璫清流成黨禍冤獄借封疆北
寺朝臣盡東林士氣傷龍眠山色在常照墓門旁

行廬山下

萬壑生風雨泉聲亂石閒鳥隨孤寺沒僧帶片雲還身
世悲塵網仙靈識舊顏如何咫尺地惆悵阻躋攀

觀春明夢餘錄載黃石齋先生事

頑懦能興百代風當年直節著青宮崎嶇絕地文丞相
憤切危言汲侍中萬死邊關思補袞孤軍海嶠哭遺弓

聖朝明詔憐忠義青史成名荷至公

謝劉石菴年伯惠石刻兼寄顧星橋

楷書原從篆籀出行草變化形模殊東漢已還盛典午
鍾王並繼凌通衢有唐繼軌擅標格歐褚顏柳矜廉隅
北宋四家逞墨妙吳興承旨何其都沿及文董資力薄
妍美婉約骨脈麤石菴夫子今巨手揮灑獨握靈蛇珠
遙憶西清快染翰玉堂簪筆承明趨墨光細雨綠苔潤
曉禁冉冉春雲敷

中旨傳觀同列羨世南聲價增金鋪大江南北盛文藻

使公視學

帝曰俞冰壺玉鑑化雨浹儒林藝苑尊楷模鏤廳公暇
滄清茗隄糜初試拈鼠鬚作字愛得古人意神光迴合
非臨摹古釵金錯體殊絕寸縑片楮珍珉璫三吳名士
出門下就中篤好顧善夫雙鉤石刻盡形相傳之百世
良非誣昔聞此事急欲覩閒以歲月愁踟躕何幸驄馬
章江隅蒙賜榻本開額憑寶氣熊奕騰銀鋳神寒骨聳
鷹出笈霜皋萬里秋風呼天矯餘怒不可泄峻坂蹠蹠
盤生駒有時溫風盪天宇鳳凰刷羽翔雙梧檀欒蔽虧

邃谷暗榿林濕露啼鼃鼃捧觀如獲百朋錫欲從苦卓
慙其駑明年都下遇顧生還將私意陳區區畀我月滿
樓中數千本毋使藝士想慕徒操觚

晚遊螺墩

天然位置小煙鬟點綴眠鷗浴鷺閒水郭晚涼生草樹
石林秋爽借湖山夜深風月兼雙美江近漁樵共一灣
此地竟疑塵境隔他時誰信夢緣慳

晚秋感興

江樓東望盡三吳落照西風彭蠡湖鄉信已聞荒稻蟹

客懷何處覓萼鱸晚霞圍郭山深淺秋水連洲雁有無
却喜郡齋吟詠地免教詩興敗催租

滕王閣晚眺

閣勢瞰章江登臨俯大邦斗牛棲密戶吳楚納虛窓天
地秋空濶魚龍夜擊撞詞人文藻在高會竟無雙

聽牟髯琵琶三首

碧蘿飛雨落遙天百尺松濤十丈泉一枕綠窓殘夢覺
秋風吹入四條絃

誰將摘阮寫幽哀花月歡場去不回歌扇酒旗前輩事

綠腰曾學段師來

當年遷客賦琵琶月白霜清怨最賒
欲問江州舊亭子夕陽秋草滿天涯

德安道中曉行

曉驛楓楠路霜皋橘柚園山泥紅屐齒
崖溜碧衣痕陰壑藏孤寺疎林露遠村
匡廬晴翠裏雲海湧朝暾

宿東林寺

曾過廬山路舊諳又隨暮色到松庵
白雲陰壑沈幽磬黃葉秋燈露小龕
半夜星辰開法界中峯猿鶴入禪參

天風吹夢遊仙去
雙袖氤氲染碧嵐

晚渡潯陽江

長江渺無際
有客暮揚舲
嶽色千尋碧
潮痕九派青
魚梁秋草淺
蟹市水風腥
楚望煙波遠
空濛接洞庭

遊武穴何氏園亭

聞說邗江好
來看亭榭幽
半篙秋水渡
一角夕陽樓
樹影連洲合
山光隔郡收
楚天香草夢
此地也勾留
問訊園林主
因依水月鄰
湖山皆入畫
魚鳥亦親人
門外看花舫
牀頭漉酒巾
一溪紅葉路
疑是武陵春

靜厓詩初稿卷四

靜厓詩初稿

卷四

靜厓詩初稿卷五

鎮洋 汪學金 敬箴

古今體五十六首

起辛卯十月盡癸巳三月
自江右還里入都往返作

餘干舟次與家人晚話

晚坐篷窓底揚帆夕浦昏煙霏連渚色沙脈斷溪痕林
屋楓如燒山田稻有孫歸程應計日剪燭話家園

安仁道中

有客推篷意渺然布帆低挂晚湖天白沙洲外環溪屋
黃葉風中上水船覓句先移烹薺具開醅多費買魚錢

一聲欸乃叢蘆岸驚起閒鷗自在眠

晚之廣信

孤城辨斜日人語暮煙濃亂草荒秋燒高灘急夜春嚴
霜空堡角明月上方鐘今夕遊仙夢靈山第幾峯

玉山道中

插壁礙帆行猿啼客夢驚魚龍晴壑氣風雨夜灘聲斷
澗飛蘿挂崩沙卧柳橫不知盤折路何處是江城

過嚴先生釣臺

高臺照千古七里溪山深溪水清如此山光碧到今松

箕溪上色鸞鶴山中音獨有持竿叟當年同此心

和顧星橋同年登鎮洋山

蒼然海上一峯開遺蹟曾傳刺史臺
鼇日曉臨諸島動蜃雲晴擁十洲來
地留風月延幽賞天許湖山付逸才
到此便知仙骨具凌虛直欲上蓬萊

山有來仙招
仙遊仙三亭

顧星橋貴香嚴同年過訪次韻奉酬

相思渺結楚雲邊便放西風彭蠡船
東海漁樵歸客計滄江風月故人緣
玉梅九九飛觴夜紅豆雙雙記曲年
更憶長安諸酒伴天涯尺素倩誰傳

范芝山同年過飲卽席有贈次韻奉酬

長安冠蓋集名流佳士聯翩上李舟曾選南金歸冶鑄
更開東閣舉觥籌我慚附驥差隨尾君許登龍獨出頭
為憶傳經風月帳燕臺一望暮雲稠

芝山與余俱出高陽李石渠師門下

揮手東風別思牽足音空谷喜楚然夜溪訪雪人初至
寒園探梅信乍傳竹館圍爐宜小飲楓橋歸棹徧殘年
期君同踐東華約花柳春深尺五天

題浦流槎梅花村

前年攜榼平山堂萼綠一笑春風香舊年客遊大廈嶺

南枝北枝散花影今年歸棹滄江邊短筇破笠尋荒煙
蓉莊百本久零落壺觴已斷詩人緣阿誰種梅得梅趣
閉門便似深山住亞簷曲戶尋丈閒占斷羅浮最佳處
我將一訪梅花村流水香中直到門主人為花不惜費
且將一石好留髡

題外祖拈花微笑圖

三徑歸來思入社一坡閒去愛逃禪但飯金粟參無上
便脫緇塵睨大千林下卽今真達者圖中自昔已超然
眼前會得觀空意只在松風與石泉

青川言才
卷三
三
渡河

長淮北去捲風沙兩岸黃蘆起戍笳雲草中原湮禹跡
斗牛上界識仙槎尊前并朔英雄氣篋裏河渠著述家
聞道舊年秋汛急至今壚壤未桑麻

鄭州道中

廢壘空城路自遙蒼茫回首旅魂飄山連燕趙虛南望
水過江淮盡北條古道驚沙隨馬捲荒林積雪逐風消
鄉書應附歸鴻翼欲撥浮雲盼碧霄

食魚有感

一月河魚入饌難今朝忽喜到盤餐也知客裏空彈鋏
可悔江頭漫擲竿下箸及時調膳缺呼童何處覓書看
阿儂對此關情甚春水桃花滿釣灘

臺莊解纜南下舟中口號

征車歷碌乍停驂喜覓扁舟坐卧堪重放棹時如昨日
一開帆處便江南幾頭魯酒糲糊醉舵尾吳歌款乃諳
從此煙波清夢遠短篷穩繫讀書龕

泛舟平山堂徧覽諸園之勝得詩六首

平塘十里蕩輕橈春草春波更柳條一夜東風染濃綠

曉來無處認紅橋

面面疏寮面面欄層樓飛碧更流丹何如減却三分屋
略放溪山卷幔看

暖護山泥曲引泉雕欄紅藥醉春煙也知金帶圍難覓
判得儂家十萬錢

時各園芍藥盛開

居然亭館仿山茨淡淡春風六枳籬繡谷金隄人似海
此閒誰肯立移時

酒榭歌樓一笑中六朝舊恨泣秋蟲繁華轉眼如流水
請看花臺昨夜風

點綴茅龕閒竹笆小香雪海占煙霞却憐前度匆匆甚
竟負山南二頃花

廣陵送春曲

冷風疎雨煙濛濛珠簾十里捲落紅落紅飛入誰家院
曉閣新粧乍勻面斂翠顰蛾下玉鉤愁黃怨粉低金釧
錦幕生憎乳燕棲繡牀不耐游絲罥傷心佳麗委流波
轉眼年華等飛電織錦空勞竇婦機裁紉易怨班姬扇
竇機班扇漫言愁才子天涯淚如霰詞賦誰憐明遠工
文章坐惜江都譴送春何處不含顰憔悴風花勿復陳

行人莫上隋隄望撲面楊花愁煞人

渡江之潤州

旦發廣陵城春潮瓜步生江山橫地出舟楫候風行草
色津樓暗人煙水墅晴歸程好時節花鳥解相迎

望錫山

落日氣澄霽歷歷湖上山山光展新翠照我睂睫閒長
空蕩餘靄恍朗煙中鬟坐愛夜色佳放棹尋溪灣船頭
挂初月流光映頽顏緬懷舜欽跡仰止思追攀行當結
精舍煮薺弄潺湲

無錫道中

芙蓉湖上漾晴波有客微吟倚櫂過
初月近人偏婉約
暮春無處不清和
溪濃山淺樓居好
釀美泉香水市多
如此平江風景勝鄉園安穩著漁蓑

黃埠墩

一點浮孤嶼三層匝密林魚龍依地肺
樓觀瞰江心
鏡裏搖帆影煙中出唄音
昔年登覽處山色到來深

題毛宿亭為朱元圃寫雄山獨立圖

雄山之圖畫中絕落筆揮灑西河毛
題詩知為朱四寫

二子眼底無時髦一朝向我索題句泣盟晉楚參邾曹
瞠目撫卷開且闔雖有弱管焉能操石華詩人

王亭父

壇坫拔戟可作皋蘭鑒三年客遊淮上去信息不到婁
城壕而我強顏作解事叢鏞遏響鳴鐸靴眼前峰巒置
座右風雨雜沓生秋舉深林絕壑鬱奇秀令我忽發胸
中豪我聞朱四好遊歷出門四顧鷹脫條太行積雪照
天地大河落日掀波濤孟門王屋插天際側睨齊趙窮
秋毫歸來江村不稱意屋梁仰面心忉忉毛子頻年客
京洛今春已釣蓬山鼇男兒自有湖海氣周覽八極風

雲翔無為局促困尋丈坐如鴈鷖棲蓬蒿

集王雁湖齋分擬謝康樂登池上樓

太璞孕潛質孤桐閱元音懷璧屏竒炫撫操棲幽沈竊
祿有夙媿治焚匪易任守拙曠簿牘養睿耽泉林端居
久晻曖佳序暫登臨廣川罄窈曲層峯辨歆崧依依池
上柳藹藹庭際陰惠風榮故卉暄陽悅時禽超化契任
釣傷羈感烏吟勉思保初服疇為識素心抗跡慕往哲
希名陋近今

元圃齋賦竹

主人劇有子猷癖荒齋洗竹森寒碧兩年接屋人海中
幽夢不到檀欒叢今年歸卧滄江畔新翠泠然照人面
南風颯來攤卷時蕭森密蔭催題詩西家朱四亦種竹
瘦綠欹峯撐老屋掃徑招邀麈尾談到門便入簣簞谷
旖旎含漪淺粉勻襠褌墜露駢枝簇素節爭期歲暮心
清陰且泛盃中醪回首春明踏軟塵對此倍覺清心魂
金伏火炙汗在背何可一日無此君嗚呼此君非我與
爾誰為羣

遊南廣寺

郭外招提放艇尋上方鐘磬證潮音石壇凝景松身去
山閣連陰竹色深臨濟傳燈分雪竇文殊散雨滿花林
髻絲禪榻生平事還我真如自在心

平遠水閣銷夏得江字

脩竹叢邊樓突兀垂楊陰裏水琤淙補成銷夏三閒屋
留得看山一面窓野客盤餐生計淡故人尊酒我心降
他時舊雨天涯夢欲采芙蓉隔暮江

王秋樵舍人齋中銅雀瓦研歌

鄴臺片瓦遺漳河舍人一見三摩挲竒貨詎惜遠道致

異物亟授良工磨剗剔苔蘚露文理辨晰篆隸分疑訛
渾淪形製法軒孔熊奕神采羞陶羅半肪腴膩割雲玉
四隅刻畫蟠蛟鼉當時埏埴擅秘造漬油瀝土含清和
年深得地潤入骨貯水三日猶盈渦舍人愛之出詫客
傳觀勸我為長歌我聞建安炎漢蹶老瞞竊弄天王戈
咄叱彎弓射吳蜀指揮飛檄臨牂牁築臺銘功藐神器
金碧千仞形差我白日簪裾燕詞客黃昏羅綺陳嬌娥
須臾典午市朝變興亡一瞬如燭蛾高臺旣傾歌吹歇
駕為分拆埋煙莎漢宮曉露泣金掌晉陌陰雨悲銅駝

人物代謝等閒耳此瓦豈有神鬼常撫呵後人收拾亦
好事都市值比千鎔鍋周鼓零落置太學禹碑殘缺淪
山阿部鼎斯篆均醜物而乃寶貴理則那君不見西陵
樹死長蓬杞疑塚地壑成麥禾當塗到今一千五百有
餘歲區區此瓦奚足多研兮研兮爾奈何

題趙承旨手書琴譜小楷

吳興墨妙近來稀瀟灑丰神此庶幾想見玉堂熏小篆
朱絲闌子譜金徽

大都倒屣文章客內殿揮毫侍從臣便向江村老茅屋

知音也有管夫人

中郎焦尾無真賞揚子清英已累名自絕人間廣陵散
誰將遺韻託嵇生

燕翼堂觀外祖滇蜀視學二圖

明堂曉啟鏗大鏞日月八表開鴻濛軒鏡

九重照幽渺禹圖萬里歸帡幪狂榛嚮化達蒙詔剽悍
革俗綏渝賓鄙者淳樸翹者秀引領畿輔梯航通太原
使者文章宗海內山斗聲隆隆

天子臨軒賜手勅欽哉汝往祇厥躬昆州絕徼慎于後

寵以軺節揚旌種瀾滄江上峯龍從盤螺玉案連秀嵩
巨靈不蹠積氣厚并鬼入夜光熊熊就中佳士亦林立
細禮文布昌而丰山璞未琢少圭角野鶴欲舞猶氈氈
日邊使者乘傳至熙然百物遊春風三年教成士可用
獻之

天子嘉其忠西川奇險勢阻絕

帝曰非汝敷教焉為功移車奉節更入蜀劍門棧閣爭
神工地靈所聚挺人傑文章詞賦褒與雄百千年後一
提唱鉛槧下士如發蒙蜀人歡喜滇人歎西望蜀不歸

我公郡人自留益州像曹霸善寫丹青容豈以繪事耀
榮寵紀

恩述覽心滋恭卽今解組滄江東明珠不載歸囊空持
此二圖示里鄙展卷開拓書生胸昆明池水磨青銅大
哉潑墨山姿濃結撰臺閣散金碧描摹獐麋填青紅滇
蜀山水天下絕昔我少小何能從今日據圖開且闔操
管欲賦心忉忉吁嗟公之勲業銘鼎鐘膜拜猺戶歌巴
童此圖留傳藝林寶當與韋經韓笏子孫世世垂無窮

送王秋樵舍人入都

落月照南澗涼飈吹北林
黃河渺天末紫塞動秋陰
忽發陽關唱應思吳會吟
為君折叢桂莫忘故園心

秋日同朱元圃晚步南園遲王藕夫雁湖不至

秋容媚夕景幽境結遐想
佳時愜勝尋美遊惜孤往
將儔覓素心探邃獲元賞
雲霞氣澄藹原陸勢沆瀣
亂流散石淙細路伏榛莽
林壑迭暎蔚軒除坐超朗
陰厓露氣凝寒圃月容廣
閒庭一葉投悄壁百蟲響
素節悼奄徂前遊憶疇曩
願言敦古歡毋為役塵網
志合跡自親義孚道豈枉
攬衣望停雲却立增悽怏

陳朝檜樹歌

上海靜安寺檜二株陳明禎時所植宋朱勔繪
圖以進將毀寺徙之大雷電失其一

靜安寺前兩檜樹左擎右攫龍虎踞傳聞種自明禎間
南朝舊事非無據辱并煙花勿復論後庭金粉歸何處
桑海曾經閱歷多風雲常託神靈護宋家道君政本傾
朝廷大半妖狐聚使者騷然花石綱繪圖傳奉江南路
詔移此樹走萬牛雌枝淒咽雄枝訴電光墮地馳五丁
天矯蒼鱗破空去異物能令真宰憐良材不受權奸汚

我來更歷六百載依稀故老猶能語
夜半天風海上來
吼空似作雙虬怒

曹氏園看菊

秋色媚孤思疎英點碧苔真能如我瘦
獨耐背人開
乍見逢良友相期倒酒杯看花還看影
月夜曳筇來

送王小弁之任龍游丞

石渠撰述動蘭臺捧檄毛生喜色開
自是

國恩容祿養休嫌闕尹辱仙才一官竟許移家去
小隱何妨作吏來
詩酒湖山真不俗桐君嚴叟莫相猜

青川言不刊 卷二
咏蕪湖工製鐵柳

別具錘鑪妙真成枝節森誰知望秋質亦有歲寒心
一幅靈和景蕭疎意不羣陽關第三疊吹出鐵龍君
依依原物態落落亦天工笑他灞陵岸飄蕩任春風
百鍊為繞指此理豈或昧取諸古人中魏公真嫵媚
送沈用高客寧武幕

北風雁叫寒客路太行山樹接飛狐口雲橫倒馬關姓
名文士賤啼笑旅人艱那更黃榆雪催將髣髴斑
寄懷上海施秋水

天人策罷動螭坳海上才名早夢蛟賦命屢愁磨蝎限
得時初應漸鴻爻機雲京洛稱佳士孔李門牆託密交
聞道秋風理歸棹蒹鱸同話舊衡茅

題朱元圃詩集

朱君奇傑士詩卷動江關正始杜韓後悲歌燕趙閒迴
瀾尊砥柱傳世信名山莫更嗟生計行藏學孔顏

同朱元圃王雁湖許洗瓢過問梅禪院月印上人
留食兼呈南園王竹娛丈

名士多禪悅高僧不世情坐來疏食飽聽到晚鐘清山

叟扶筇笑溪橋踏葉行
重申問梅約衝雪至南城

晏起

晏起亦清福疎慵性不移
撥灰煨芋火呵凍乞花詩
殘臘含春淺初陽禁雪遲
峭寒欺敝褐差覺薄醪宜

題新竹圖

春雷起地山泥溫煙莎漠漠連雲根
仙人戲擲綠玉杖曉來迸裂蒼厓痕
檀欒初生便得地三日大有捎雲意
世上誰同高放心風前獨擅蕭疎致
山中紫霞翔白鸞美人斜倚青琅玕
天寒翠袖無言態傳出蕭郎十五竿

延清軒觀大理文石為張萼聯賦

春陰三尺低壓簷虛堂雲氣春醅醅延清軒中貯文石
漆匣乍啟爭窺覘骨節堅潤色蒼碧文理刻畫皆精嚴
荆關擱筆寫不得天然靈氣成飛巖巖端仙人髯毛綠
玉芝瑤草堆筠簋巖下清江清見底游魚連尾波潭潭
樹石禽鳥盡形相物態栩栩生毫尖四座拍手叫奇絕
賤子那不據案摩挲抄三平生好玩百不入此物竟使成
奇貪米公攫取吾豈敢平泉秘惜君何慙此時老梅花
撲簾社酒百甕開醅酣但得主人日召客青芒踏破南

城南

滇南李五峰少尊招同朱元圃毛宿亭小集

時寓海寧

禪寺

一官寄精藍孤僧互昏曉不聞衙鼓喧坐覺山鐘悄卧
閣日過午公庭吏曠卯是時春風初殘雪映階草紙窓
動疎梅石戶媚寒篠使君一卷書抱膝事幽討興至忽
邀賓入門共傾倒瀟灑愛毛公倔強稱朱老賤子愧詩
豪蕉飲戶亦小竭來文讌懽共此山蔬飽譬如優曇花
迴出風塵表齷齪折腰煩蒼茫掉頭好萬里萍與蓬相

逢苦不早

陸所亭業師移居西郊用田山蘊移居詩韻奉呈
黃金寶馬雕輪車三吳大賈百萬家甫里先生貧到骨
避地却走如山麋移居半畝元亮宅糴米五升博士衙
畦丁村叟話不厭有時坐到溪日斜眼前富貴比朝露
開落請看姚黃花東風緩緩引雛燕山果垂垂哺老鴉
塞翁得失兩不計達觀消釋岑牟搃縱然缺陷我能補
鍊石何用煩神媧

静居詩初稿卷五

青崖詩初稿卷六

鎮洋 汪學金 敬箴

古今體五十七首

起癸巳三月盡甲午六月入都作

題曹蓮浦內兄灌園圖小照次朱元圃韻

食肉何如藜與藿買田何必鄠與洛但得江鄉紫畝宮
種菜澆花一生樂曹郎灌園圖最佳青陽初茁春根芽
牆竹過雷迸短筍籬豆帶雨垂疎花一衫一笠意蕭散
朝朝汲水循畦灌煮菽登堂阿母歡烹蔬饌客山妻慣
梁雌飲啄貴適時晚食安步精神滋園粟未荒腐儒計

書人言不示
一
瓊蘂亦荷皇天慈世人何事倥偬走梁肉酣酣成白首
萬錢日飽五侯鯖不如細嚼家園韭

題曹雪園內弟風雪訪琴圖小照

白雲夜凍青山路樹木槎枒莽前渡隨風吼地千萬聲
鸞吟鳳嘯音琮琤衆中有聲更殊絕一洗萬古箏琶鳴
匠斤樵斧不得到獨與山水成孤清阿誰愛琴具真識
一笠空山冒風雪越壑穿林意苦艱泠然一往心神閒
視聽獨出意象外冥契乃在虛無間嗟君寂寞衡門下
亦比琴材淪廣野破屋天寒冰霰深世間誰是知音者

山塘

陟柳紅驄拂山桃紫燕銜片雲輕掩岫細雨不收帆
茶市藤花閣溪人杏子衫吳閶好時節遊屐在靈巖

孫桓王墓

立馬橫戈控上游三吳部曲竟全收一時賓從風雲會
半壁江山牖戶謀王霸無成嗔紹術英雄不死失曹劉
墓前嗚咽東流水猶恨降帆出石頭

登潤州城樓

天入南徐遠雲橫北固長江流分楚蜀山色失齊梁此

地三吳險當年百戰場憑高一回首故壘盡耕桑

風雨渡揚子江

一載淹留東海濱挂帆三日又江津萍蓬蹤跡元成寄
風雨蒼茫亦有神芳草暗生瓊樹曲青山曾識錦袍人
閒情付與漁舟笛漫對岷峨萬里春

遊二嚴菴

廣陵嵯
商所建

梵宮丹碧絢雲霞檀施祇園事劇奢金地通神要福慧
寶林變相現豪華龕禽不舞氍毹羽闌藥齊開爛漫花
底怪老僧相揖罷對人誇煞石崇家

送春

芳草如煙送畫輪
游絲飛絮滿江津
東風與我看花便
留得無城一日春

玉勾斜外柳絲絲
傳遍新詩杜牧之
千片梨花千片雨
銷魂人似去年時

舊年余有廣陵送春曲

廣陵舟次別業師所亭先生次元圃韻

昔日燕臺去曾陪杖履遊

戊子余從先生入都

此行誰共我相送

轉增愁客路大江北歸人東海頭
寸心與潮水一夕下

伊婁

河名在潤州

舟中與元圃論婁東詩派兼寄同學諸子

煙月家家綺麗篇吾鄉正始獨斷然徐王壇坫千秋事

昌穀弇州
兩先生

沈許門牆一輩賢

長洲許竹素先生吾鄉沈
敬亭先生先後掌教婁東

書院振興風雅一時
稱詩者皆出門下

尚論自知交有道齊盟須仗筆如

椽欲彈流水高山曲留作人閒古調傳

疇昔論交冠蓋通滄江文采氣成虹南皮盛會聯今雨

東海雄才數大風遺稿青山悲宿草

時陸沁雪胡載培
陸秋涯俱下世

生涯白髮嘆飄蓬荒村賸有毛萸在

謂宿
亭

冷落殘樽夕

照中

讀元圃辭家詩次韻和之

漫攜書卷上江舲拋擲滄洲一草亭肯使才名淹里閭
祇緣菽水憶門庭江湖蓬鬢爭春白風雪綈袍戀客青
重到長安人盡識不教王粲久飄零

射陽湖晚望

射陂千頃水一望愴羈魂風雨喧淮口煙雲蕩海門近
聞春漲急遠挾濁流奔保障勞當事東南十萬村

淮上懷王石華

風雅滄江盛君才衆口傳一身千里外半面十年前却

憶金陵酒難歸淮口船王孫飄泊甚乞食更誰憐

清江浦見河水暴漲作

我從射陽來陡覺河流勁千里淮黃通萬派東南迸三
牖瀉奔湍千夫挽脩絙爭持尋丈閒譬若車在濘遂令
南風帆難與洪濤競方苦行路艱轉念居人病天晴黿
鼉浮日暮魚蛟媵荇藻挂茅簷蛙黽躍瓦甑那復顧屋
廬行且憂性命我聞崑崙源終古勢豪橫自從海道淤
逼防已違性近來頗安瀾所賴

天子聖

明詔發度支金隄資奠定淮南十萬家始有農桑慶偏
灾偶入告

宵旰常憂恟救卹無不周軫念務綏靖卽今監河臣尊
顯得專柄軒蓋何煌煌僚屬奉其令上不負

九重下可惠萬姓哀彼中澤鴻勉旃亟報稱勞勞胥溺
懷詩成欲投贈

過下邳

竟有亡秦日還成覆楚謀早年黃石略晚節赤松遊功
狗誰能脫冥鴻得自由始知報韓者願不在封留

咏史二首

淮陰未遇時乞食甘忍恥漂母進一飯感恩在知己隻
眼風塵中識與鄼侯比

滅韓竟亡秦廢韓乃覆楚生平志必就此事足千古嗟
哉智伯臣殺身亦不武

同元圃登濟寧太白酒樓

落拓李供奉清狂賀季真兩賢元絕代一醉亦千春我
輩還登閣高風孰與鄰揮杯對明月重問放歌人

青嶽橫雲起黃河入濟流長風來北極落日下南樓湖

海飄零客乾坤汗漫遊狂歌人不識煙水渺滄洲

始聞蟬聲

篷窓午夢醒蟬響出高林知候憐微物聞聲警寸心
善鳴時未晚懷潔意何深風露家山飽翻為行路吟

四月十五夜坐月懷許洗瓢却寄

滅燭竟無寐推篷月皓然我行千里外愁對兩回圓
風笛靜生浦沙禽飛近船獨懷挂瓢叟高咏五湖天

苦熱十六韻

暮春就水程兩月始東郡風土魯入齊河流濟交汶一

舟歎濡滯隻堠越宿信炎節屈鬱攸溽暑苦蒸悶淺沙
漲痕枯禿柳生意困兼旬雨斷膏每夜月生暈當空火
雲屯向午赤輪炊篷窓氣不舒纖絺汗難拭嘈聒耐長
年鬱陶搔短鬢直比井蛙窺頗愧枋鳩奮俄覺夕景移
稍愛帆風順颯然散清泠豁若去疾疾舵尾尾河魚船
頭酌村醞坐卧雜諧談歌哦競險韻昏旦異戚愉行止
信利鈍素懷謝薰灼毋為矜銳進

東昌咏史

第三十四首 指縣高皇帝神牌於城隍故事

五月燕兵下朔方尚書一力挫強梁大呼高帝千軍却

半壁巖城隻手當到死國讐無北面至今戰捷紀東昌
書生曾讀前朝史憑弔孤忠思獨傷

守牐聊城見岸傍作猴戲者紀之以詩

守牐不計程一舟繫官柳岸傍銅鈺喧兒稚遶場走誰
歟沐猴冠羊犬作羣友跳擲學尋橦牽援類木偶笑或
絕其纓啼或昂其首乘軒氣輝煌據鞍勢雄赳索錢伺
人意多寡計可否萬物人最靈那無術餬口乞靈到羣
動塊立亦可醜大抵臨淄俗豪傑逐雞狗齊民輒效尤
相率事游手或言此輩中崔苻作淵藪連羣動什百焉

能辨良莠民生有本計曷不返南畝廉恥教漸微推埋
習已久鰓鰓風俗憂作詩告牧守

舟夜卽事示元圃

偏仄篷窓暑漸蒸晚風吹水碧層層溪邊白鳥低飛月
樹底青蟲亂撲燈日永閒消書一卷夜涼緩盡酒三升
却思銷夏灣頭好近有江南夢未曾

吳季札挂劍臺

我過東魯邦高臺照清濶卓哉延陵風脫劍挂隴畝君
子重信義此事豔人口我思季子賢讓吳義弗受長君

國本繫千乘棄敝帚大節既不虧細行夫豈苟先聖重
人紀五倫及朋友後來漸凌替古道誰能守翻覆作雨
雲那更論然否君親尚弁髦餘者復何有聞風倘興起
薄俗庶敦厚但願河畔臺巋然長不朽

過臨清訪謝茂秦故居不得

客舟晚繫衛河濱却憶論詩謝茂秦異代風煙青海宅
中原壇坫白衣人關河墓遠魂難返墓在鄴下車笠盟寒事
莫論回首三弇文藻地風流一樣絕音塵

漳河神廟

聞道漳河水重經入衛行漳水入館陶達衛河以濟漕運萬歷二年北徙流絕康熙

三十六年仍復故道靈長關

國運功德在民生簫鼓漕丁社軒除節使名

熙時神効職隄牒慶平成

出牒

誰知船出牒竟比鳥脫籠自從任城來屏息坐短篷津吏醉如泥啟版日高春一版復一版計程無百弓日隨漕舸行跋躑難為功下僚侍大吏日夕心忡忡榜人抵臨清懽言舟楫通相賀各舉酒我亦開心胃今日衛河

昨日德水東直沽七十二借我一帆風

雨

一聽淮壩雨風沙日日程夜窓猶月色早枕忽雷聲稍
覺河流長能令溽暑清最憐蒲艾節張觸故園情

夾馬營

中原戎馬滿村墟蠻觸江山轉瞬餘一統自從歸點檢
羣雄原不費驅除黃袍真氣驚嘶馬白髮山人笑墮驢
休議燕雲揮玉斧肯窮兵力拓金輿

吳橋范文貞公故里

靜虛詩初稿

卷六

羣盜縱橫日孤臣涕淚中乍宣綸閣詔旋墮鼎湖弓事
去難謀國時危始用公紛紛枚卜地碧血竟誰同

滄州鐵獅子歌

周世宗時鑄

滄州鐵獅一丈高昂然獨踞空城壕此物本是百獸長
鎔金爍火偏能豪罡風倒吹屹不動熊虎辟易狐狸嘯
荒原無人陰雨澀苔花斑駁團青毛傳聞鑄自周景德
金精雄長交河北五季兵戈笑觸蠻黯然王氣全無色
就中傑出柴世宗虬鬚咄叱生雷風高平一戰鶴水捷
東南降表車書同下詔迴師指通路六軍駐馬幽并路

契丹北走棄關南健兒敢向桑乾渡羽林齊唱凱歌旋
銘功鑄物垂千年宣王石鼓紀東土漢家銅柱標南天
轉瞬宮車驚晚出六州一錯何倉卒點檢俄傳赤伏興
陳橋亦比黃旗裂銅駝荊棘不勝愁而髮圓睛此尚留
滄桑眼見渾閒事白雁飛來浙水流

津門望海

析木星躔應裨瀛地勢雄黃圖天直北滄海水流東往
代之衆觀何年碣石宮夜雲消蜃白曉日射鯨紅輦轂
名州近帆檣絕島通斗牛槎可泛有客慕乘風

寄懷陸璞堂

燕臺刻楮共雞壇
席帽重來省舊歡
珠履華堂三絕貴
錦袍醉墨萬人看
聽鸛春館虛傳
醵寄鯉秋江屢勸餐
幾度相思今雨夢
五湖煙水不勝寒

十年清譽滿京華
袖裏珠璣衆口誇
親向上林攀桂樹

曾從東閣賦梅花

璞堂受知於金壇
相國薦應召試

九重新識遊梁客
八口初移入洛家
自是大賢能薦士
不教荆璞久泥沙

豹尾雞翹近

九天日隨上相奏書牋歌翻絕調關山月人說清才幕
府蓮射虎圍場秋草外鳴駝沙路夕陽邊書生他日傳
佳話親奉灤河侍從鞭

劇喜天涯慰索居停雲渺渺尚愁予鶯花已濺懷人淚
風雨初傳出塞書何日園官供菜把與君鄉思話鱸魚
青衫自笑無長策漫擲滄江一草廬

紀曉嵐先生中元夜招飲賦呈

無邊風月接庭除清讌初開問字廬虎觀文章歸領袖
龍門聲價藉吹噓南州已下徵君榻東閣常通學士車

便是本師說圓智鈍根也許悟真如

題趙少鈍蜀道紀程詩

海棠春盡雨如絲錦袖花牋擲管時
萬里才名叩笮道

九秋涕淚蓼莪詩

時尊人璞函先生
在金川軍營殉難

白雲猶繞鸛叢樹

碧血難歸馬革屍地角天涯回首處
箇中哀怨杜鵑知

寓屋

大道無喧寂栖遲人海家
但存魚鳥性便隔市廛譁露
果緣柔蔓風槐落細花
擁書常闔戶不信住京華

鐵冶亭選君以詩文見示卽次贈章元韻奉簡

深秋窮巷閉門住西山壓戶青巉巖科頭不冠亦不櫛
齷齪世事皆除芟馬撾打門佳客至朗如玉鑑初開函
示我新編足光怪珍庖饜飫山癯饒海嶽潏潏入睥睨
蟲魚細碎供雕剗長吟擊節心骨爽三日坐我松風巖
九秋一鶴唳天半弄春雛燕徒呢喃平生哆口盛意氣
一朝縮舌思三緘百年風雅豈寂寂餘子塗抹何摻摻
縱令時好亂蛙紫要使俗樂回韶威異苔同岑各傾倒
相賞意味殊酸鹹君不見鳳凰芝草閒世出往往少見
多怪驚愚凡

簡嵇蘿浦

時移寓
法源寺

孟郊家具本無多，破甕殘書細載過。
不道六街人似海，此中閒煞病維摩。

一住僧寮事事慵，藥畦花徑漫支筇。
料來彌勒龕中客，耐得闍黎飯後鐘。

齋魚粥鼓靜無譁，隔斷青雲顯者車。
賸有柴桑舊居士，西風來對九秋花。

何數峯之京

章水三年客，婁江十日人。
重攜黃海履，來踏薊門塵。
風

尊在關河旅鬢新相逢應不易執手轉傷神

用坡公韻題煙江疊嶂圖卷子

來洗眼看西山薊門雨歇橫秋煙南樓讀書日一卷
半對月出山蒼然人生百年亦袞袞有何嗜好惟林泉
九衢車馬五都市歎忽世事東流川縱然僦屋人海內
軟紅不落雙眸前有時狂歌意不憚煙波忽憶江南天
阿誰示我好圖本江山點染清而妍扁舟自泛甫里宅
短犁竟置陽羨田金焦兩點落我手肯使勝事輸長年
北固潮平天淼淼南徐木落秋娟娟船頭一竿尾兩瓊

風濤不撼山翁眠。明月常照牛渚夜。青山尚識宮袍仙。
生平自信亦瀟灑。江湖未必無良緣。卷圖還君發長喟。
令人三復髯蘇篇。

雪後招喬樸園嵇籙浦錢小丙趙少鈍平寬甫小
飲遲陸璞堂史竹圃不至

燕臺飛雪填城壕。三日欲與城樓高。西窓病夫裹頭坐。
壁風四下如崩濤。數椽老屋半破瓦。十年敝褱全無毛。
此時無客更少酒。縱有奇氣焉能豪。山妻拔釵付沽肆。
平頭走簡招朋曹。坐中六人五吳下。齊作鄉語聲嘈嘈。

山陰美人玉堂彦

謂寬甫

却與短褐稱同袍狂奴故態不

自禁排斥時論談風騷相逢知己各傾倒那管流俗紛
訾謗眼花耳熱燭再跋霜淒月白雞三號但惜陸生未
投轄史侯易水橫輕舸生涯鉛槧亦何益如鳥羈紲難
翔翺長安大賈盛意氣吹竽擊鼓驩呼蠶錦裘入門騎
大馬金盤行炙烹肥羔腐儒蔬盤不果腹譬如井李爭
螭螭漆園傲吏夢蝴蝶漢陰丈人羞桔槔有酒竟須澆
傀儡醉來萬事皆秋毫

豐山師楚撫還

朝奉

命以少宗伯入直樞禁喜而有作

十年杖履隔春風夾道歡迎節使驄旄鉞遠迴三楚外
絲綸新掌五雲中禁廷典禮容臺貴從事文章幕府

雄謂沈魯泉舍人不載明珠載琴鶴於今清望孰如公

正月十五夜海淀坐月

冉冉離滄海層層徹彩霞燈輪春欲曙漏箭夜無譁鄉
思三千里清光十萬家客中新鬢影一度惜年華

春曉策馬至海淀同戴蓮士作

春苑沙痕印馬蹄東風聯轡錦障泥雲中殿角紅先露

雪後山腰翠尚低
草色遠濃馳道外
柳絲晴拂掖垣西
與君共話江南夢
牆杏窺人照淺溪

聖駕駐蹕南海子行園恭紀和豐山師韻

蜺旌華罕捲春煙
南苑于田羽衛連
諏吉恰逢耕藉後

親蒐先試哨圍前

年例中秋後
蹕進哨行彌木蘭
啟

六飛弭節三驅習
七萃開弮百步穿
自是承平不忘武
長楊已陋子雲篇

肅肅中權駐

御營但聞晝漏不聞聲
期門萬騎屯沙海
穹幕千官近

布城雨後圍場春草碧柳陰馳道午風清錦韉叱撥連
錢動新識飛龍廐裏名

飛放泊前

輦路開林垆百里亦雄哉綠蕪春暖藏麋子紅杏花深
起雉媒此地豈容甌脫置及時端為

簡鬼來抽毫欲紀攻車典載筆深慚倚馬才

與伯恭別三年矣今夏自閩中至僕病未能一晤
而璞堂復有灤河之行成詩三首以誌離合之蹤
云爾

炎節中時疾端居屏人事披帷清風來知有故人至陳
子商邱豪結交砥同志堂堂少保孫鬱鬱中原氣英姿
馳俊聲盛懷執高義數年閩粵遊篇章益閱肆朱烏宅
南離百怪聚靈異吐欬星日精宣洩嶺海秘師資南豐

曾

謂曾
春伴

力扶大雅墜攻錯在他山蔚成瑚璉器

昔日良讌會冠蓋盛京洛獲締梁宋交時就琴尊約窮
門閑秋雨長夜動清酌入徑擷霜葩聯牀聽風擇酒酣
耳熱時四座狂歌作人生百年內得此幾回樂天涯八
馬蹄倏忽烏散幕關河念前期如夢復如昨

陸生出羣士英聲動明光
攄華翊黼黻奮藻騰精芒
伊余弇陋姿接跡翰墨場
同心無異調戛玉音和鏘
朝來遠于役馬首灤河陽
沙草萋以綠關樹青而蒼
三尺車下塵別思同飛揚
歡戚緒迭引合併情難償
相期一尊酒重對秋花傍

靜厓詩初稿卷六